

## Part quatr – Introdüssion a l'òtica fisica

An costa part i parloma d'onde eletromagnétiche e an particolar èd cole luminose. I vardoma la polarisassion dj'onde e cos i voroma d' con coerensa arferìa a j'onde luminose. Peui i vardoma l'prinsipi 'd Huygens-Fresnel, l'interferensa dj'onde luminose e la difrassion, andova i vèddroma ij limit d'aplicassion dl'òtica geométrica. Tuta sta part a l'è giusta n'introdüssion. I androma pì ant l'ancreus ant la session dedicà a j'onde eletromagnètiche, che i vèddroma dòp la session d'eletricità e magnetism. A la fin i giontoma quaicòs an sl'arpresentassion dj'onde e an sle aprossimassion che a ven-o faite. Si a ven bin parlé un pòch dla trasmission dj'onde travers element òtich.

### TÀULA DLA PART QUATR

J'onde luminose .....	181
Arciam an sj'onde an general .....	181
J'onde eletro-magnètiche.....	181
J'onde luminose .....	182
La polarisassion .....	183
Manere 'd polarisé la lus .....	183
Filtre a diression privilegià .....	183
Cristaj bi-arfrangent .....	184
Arbatiment dla lus – Àngol èd Brewster .....	184
La coerensa .....	186
Coerensa temporal.....	186
Coerensa spassial .....	187
Coerensa spassial longitudinal .....	187
Coerensa spassial lateral .....	187
Interferensa e Difrassion .....	189
Prinsipi 'd Huygens-Fresnel .....	189
Interferensa .....	190
Difrassion.....	191
Interferensa da difrassion .....	193
Interferensa da na filura.....	193
Un lìmit pér jë strument òtich .....	194
Interferensa da doe filure – Esperiment èd Young.....	195
Reticol èd difrassion.....	197
Arpresentassion dj'onde e aprossimassion .....	201
Equassion d'ónda.....	201
Onda monocromàtica .....	201
Arpresentassion compléssa.....	201
Equassion èd Helmholtz. ....	201
Intensitat òtica .....	202
Onde elementar pian-e e j'onde sfériche.....	202
Ónde pian-e .....	202

Ónda sférica .....	203
Aproximassion èd Fresnel, onda parabòlica .....	203
Onde para-assiaj .....	204
Equassion para-assial èd Helmholtz .....	205
Relassion fra onde e ragg .....	206

TÀULA DLE FIGURE DLA PART QUATR

Figura 1 - Propagassion dël camp eletro-magnétich.....	182
Figura 2 - Filter Pòlaroid .....	184
Figura 3 - Polarisassion pér arbatiment.....	185
Figura 4 - Coerensa 'd fase .....	186
Figura 5 - Prinsipi 'd Huygens - Fresnel.....	189
Figura 6 - La difrassion .....	191
Figura 7 - Misura dl'intensità angolar dòp la filura .....	192
Figura 8 - Difrassion dla lus da na filura.....	193
Figura 9 - Interferensa da na filura .....	194
Figura 10 - Lìmit èd risolussion d'un diaframa.....	194
Figura 11 - Interferensa da doe filure.....	195
Figura 12 - Esperiment èd Young .....	196
Figura 13 - Reticol èd difrassion.....	198
Figura 14 - Condission pér onde an fase .....	198
Figura 15 - Aproximassion pér j'onde.....	204
Figura 16 - Ragg para-assiaj.....	205

## J'ONDE LUMINOSE

I l'oma già acenà a cose còse cand i l'oma parlà dla lus, mentre an particolar i l'oma vist an acústica j'equassion dj'onde 'd pression e j'onde dë spostament dle partìcole. A son concét che i tnima present an costa part, andova i arpijoma 'l dëscors an sla lus. Ij prinsìpi dl'ótica geométrica ch'i l'oma vist a peulo nen spieghé la difrassion e l'interferensa, che a ciomo anvece 'd consideré la natura ondulatòria dla lus.

### Arciam an sj'onde an general

Da na mira fisica i podoma dëscrive la lus coma n'onda eletro-magnética trasversal che a l'ha n'equassion dël tipo:

$$Y = f(x - ct)$$

andova  $x$  a l'è la coordinà ant la diression èd propagassion dl'onda,  $t$  al'è 'l temp,  $c$  a l'è la velocità 'd propagassion e  $Y$  a l'è 'l vetor che a ossila, an diression normal a la diression èd propagassion. Ël segn – a indica na propagassion ant ël vers dle  $x$  ch'a chërsò.

I l'oma 'dcò vist che ògni përturbassion a peul esse scomponùa an série 'd fonsion sinusoidaj (série 'd Fourier), e sòn a pòrta a consideré onde sinusoidaj, dont la pì sempia a l'è dëscrivùa da l'equassion:

$$Y = A \cos[k(x - ct)]$$

andova  $A$  e  $k$  a son costant.

I ciomoma  $T$  ël perìod dl'ossilassion e  $\lambda$  la longhëssa d'onda, vis-a-dì lë spostament dël profil ant ël perìod  $T$ , che a corispond a la distansa fra doi mässim consecutiv. I disoma 'ncora che  $f$  a l'è la frequensa dl'onda, vis-a-dì 'l nùmer d'ossilassion al second, i l'avroma che  $f = \frac{1}{T}$  e i definima la "pulsassion"  $\omega = 2\pi f$ . Tnisend cont che fra frerquensa e longhessa d'onda a val la relassion  $\lambda = \frac{c}{f}$  i podoma scrive, antlora, nòstra equassion coma:

$$Y = A \cos\left(\frac{2\pi x}{\lambda} - \omega t\right)$$

### J'onde eletro-magnétique

Ant ël cas dla lus la grandëssa anteressà a la vibrassion a l'è un camp elétrich  $E$  orientà an manera normal a la propagassion. La diression èd vibrassion e la diression èd propagassion a andividuo un pian che a l'è 'l pian èd polarisassion dël camp elétrich èd costa radiassion elementar.

La radiassion elétrica a l'è sempe socià a la vibrassion trasversal d'un càmp magnétich  $B$  che as treuva an s'un pian normal al pian èd vibrassion dël camp elétrich, ant la manera che i l'oma

arpresentà an figura 1. I podoma donca scrive doe equassion pér l'onda eletromagnética che as propaga an diression  $x$  (is arferima a la sòlita trien-a cartesian-a)

$$\vec{E}_y = E_0 \cos\left(\frac{2\pi x}{\lambda} - \omega t\right) ; \vec{B}_z = B_0 \cos\left(\frac{2\pi x}{\lambda} - \omega t\right)$$

e as peul dimostré che a esist la relassion  $E_0 = c B_0$




Figura 1 - Propagassion dël camp eletro-magnétich

La velocità 'd propagassion dël camp a dipend da la natura dël mojen andova 'l camp midem as propaga. Sòn i l'oma già vistlo parland dl'indes d'arfrassion dij materiaj.

A diferensa dle vibrassion mecaniche, le vibrassion eletro-magnéiche as propago bin ant él veuid, sensa damanca d'un supòrt material, che ansi, a pròvoca mach assurbiment.

Dòp ch'i l'avroma parlà d'eletrissità e 'd magnetism i tornroma an sla costion dj'onde an manera pì rigorosa. I podroma definì tute le grandësse anteressà, e via fòrt. Pér lòn ch'i voroma dì ambelessì e pér adéss an basta parèj.

## J'onde luminose

Com i l'oma già dit, mach na cita part dj'onde eletro-magnétique a fan part dle radiassion luminose. A son cole che a l'han la longhëssa d'onda  $\lambda$  comprèisa fra  $360 \text{ nm}$  e  $720 \text{ nm}$  (un nanométer a l'è un su un miliard èd meter). La longhëssa d'onda (ò la frequensa) a stabiliss él color dla lus a parte dal ross ( $700 \text{ nm}$ ) fin-a al violet ( $400 \text{ nm}$ ). La lus bianca coma cola ch'a riva dal sol, a l'è na mës-cia èd coste frequense con nè spetr an pràctica continuo, e a corispond a l'emission luminosa d'un còrp scaodà a pì ò manch  $6000^\circ K$ .

La lus bianca, donca, a l'è tut d'àutr che monocromàtica, l'intensità an sle diferente frequense a l'è nen l'istéssa, e gnanca la sensibilità dl'euja l'è l'istessa pér le diferente frequense, an efèt a l'ha un màssim pér longhësse d'onda antorna a  $555 \text{ nm}$  (lus fra verd e giàun). I arpetoma che la velocità dla lus ant él veuid (e, an pràctica, 'dcò ant l'atmosféra) a l'è èd  $299\,792\,458 \text{ m/s}$ .

## La polarisassion

I l'oma vist che la radiassion luminosa a l'è fàita da na vibrassion elétrica e un-a magnética normàj fra 'd lor e a la diression èd propagassion. Un ragg èd lus a l'è fait da vàire onde che a l'han pian d'ossilassion diferent e che a cambio ant èl temp soa diression. Se donca as supon èd misuré, dàita na trien-a cartesian-a dont l'ass  $x$  a l'è col èd propagassion, èl camp elétrich medi ant le diferente diression an sël pian  $z$ ,  $y$ , as treuva che cost a l'è l'istéss an tute le diression. Un ragg parèj, che a l'è col dla lus natural ch'a riva da na sors com èl sol, as dis ch'a l'è “***nen polarisà***“. As peul dì che sta lus a ven generà an manera disordinà da le sostanse ancandessente.

Na lus polarisà përféta a sarìa na lus andova tuti ij vetor elétrich (e 'd consegoensa ‘dcò coj magnétich) a vibro an sl'istéss pian (ò su pian paraléj). Se 'l pian èd polarisassion a resta costant as parla 'd polarisassion linear, ma sto pian a peul èdcò viré ‘ntorna a la diression èd propagassion, mentre 'l mòdul dël camp elétrich a resta costant, e antlora as parla 'd polarisassion sircolar.

### Manere 'd polarisé la lus

La lus polarisà a treuva vàire aplicassion, e donca a dvento anteressant le manere 'd polarisé la lus. I vardoma giusta tre manere che a peulo esse dovrà pér oten-e lus polarisà, sempe sensa andé trop ant l'ancreus. A l'é ciáir che, dal moment che ij camp elétrich e magnétich a son camp vетoriaj e doca arpresentà da vetor, cost a peulo esse scomponù second doe diression qualunque, e a ven-o a taj doe diression normaj fra 'd lor ch'i vëddroma.

### Filter a diression privilegià

A-i son sostanse che a peulo polarisé la lus che a-j traversa. A l'è 'l prinsìpi dij filter “***polaroid***“.

Sti filter a l'han na diression privilegià, an manera che a trasmëtto bin le onde polarisà an cola diression, mentre a assòrbo sempe pì lus man man che la diression èd polarisassion èd costa a së spòsta da la diression privilegià dël filter. I notoma che sti filter, èd sòlit, a son prodòt an manera artifissial.

An pràtica sti filter a son bin trasparent pér la lus con àngol zero fra diression èd polarisassion e diression privilegià, mentre a dvento sempe pì opach man man che st'àngol a chërs. I ilustroma sto concét con figura 2.




Figura 2 - Filter Pòlaroid

Da na mira matemàtica as peul modelé sto filter con l'espression  $\vec{E}_{seurtia} = \vec{E}_{intrada} \cos \theta$ , andova  $\theta$  a l'è l'àngol fra la diression èd polarisassion dël camp elétrich e la diression privilegià dël filter. A l'è la component an costa diression che a passa.

### Cristaj bi-arfrangent

N'àutra manera 'd polarisé la lus a l'è furnìa dai cristaj bi-arfrangent, che a son sostanse an-isòtropo andova a peul esse andividoà n'ass ciamà ass òtich. La component dla radiassion luminosa che a vibra second la diression èd cost ass a treuva n'indes d'arfrassion  $n_s$ , ciamà indes d'arfrassion straordinari, mentre la component dla radiassion che a vibra an diression normal a treuva n'indes d'arfrassion  $n_o$ , ciamà indes d'arfrassion ordinari.

Cand un ragg èd lus a intra con na diression qualunque ant un cristal dë sto tipo, la radiassion as divid an doe component dont un-a, che a vibra normal a l'ass òtich, a l'è ciamà "**component ordinària**", mentre l'àutra, la "**component straordinària**", a vibra ant él pian andividoà da l'ass òtich e la diression èd propagassion.

Mentre la component ordinària a treuva sempe n'indes d'arfrassion  $n_o$  qualunque a sia la diression d'incidensa dla lus, la component straordinària a treuva n'indes d'arfrassion che a dipend da la diression èd propagassion e che a và da  $n_o$  cand la propagassion a l'è arlongh a l'ass òtich, fin-a a  $n_s$  cand la propagassion a l'è normal a l'ass òtich.

Sensa andé 'd pì ant ij particolar, a l'è ciàir che sto fenòmeno a peul esse dovrà pér oten-e lus polarisà.

### Arbatiment dla lus – Àngol èd Brewster

I l'oma vist che na radiassion qualunque a peul esse arpresentà da doe component dont la prima a l'ha l'camp eletrich che a vibra ant na dàita diression e la sonda a l'ha 'l camp eletrich che a vibra ant la diression ortogonal. I podoma arferisse a figura 3 e pensé a na radiassion qualunque che a incid an 's na surfassa 'd véder che a l'ha un dàit indes d'arfrassion, con un dàit àngol  $\theta_i$ .




Figura 3 - Polarisassion pér arbatiment

I consideroma le doe component dla radiassion che a l'han la vibrassion dèl camp elétrich, ant l'óordin, paralela al pian dla surfassa 'd véder, vis-a-dì che a càpita an diression dl'ass  $z$  an figura, e che a ven ciamà polarisassion  $TE$  (che a sta pér “Trasversa Elétrica”) e normal a costa diression, vis-a-dì ant èl pian che an figura a conten j'ass  $x$  e  $y$ , e che a ven ciamà  $TM$  (che a sta pér “Trasversa Magnética”).

Sto ragg incident as divid ant un ragg arbatù e 'n ragg trasmëttù arfrait anans ant èl véder. As peul definì un coeficent d'arbatiment  $a$  coma rapòrt fra l'ampiëssa dèl camp elétrich dèl ragg arbatù e l'istessa ampiëssa dèl ragg incident. Sto coeficent a dipend, oltra che da l'àngol d'incidensa e j'indes d'arfrassion, èdcò da la polarisassion. Da j'equassion èd Fresnel, ch'i vëddroma peui, as treuva le relassion pér  $a_s$  (coeficent d'arbatiment pér polarisassion  $TE$ ) e  $a_p$  (coeficent d'arbatiment pér polarisassion  $TM$ ), ant l'óordin

$$a_s = \frac{n_1 \cos \theta_i - n_2 \cos \theta_t}{n_1 \cos \theta_i + n_2 \cos \theta_t} ; \quad a_p = \frac{n_1 \cos \theta_t - n_2 \cos \theta_i}{n_1 \cos \theta_t + n_2 \cos \theta_i}$$

andova  $\theta_t$  a l'è l'àngol d'arfrassion che as treuva con le lej dë Snell e  $n_1$ ,  $n_2$  a son, coma sempe, j'indes d'arfrassion dij doi mojen (ària e véder).

Da coste espression, dal moment che se  $n_2 > n_1$  antlora  $\theta_i > \theta_t$  a arzulta che l'espression  $n_1 \cos \theta_i - n_2 \cos \theta_t$ , numerator dèl coeficent d'arbatiment pér la polarisassion  $TE$ , as peul nen anulésse, pér qualonque àngol d'incidensa, e donca la lus polarisà  $TE$  a l'ha sempe na part arbatùa.

Pér la polarisassion  $TM$ , anvece, as dimostra che l'espression  $n_1 \cos \theta_t - n_2 \cos \theta_i$ , numerator èd sò coeficent d'arbatiment, a val zero pér l'àngol d'incidensa :

$$\theta_i = \theta_B = \arctg \frac{n_2}{n_1}$$

A cost àngol, che a ven ciamà “**àngol èd Brewster**”, L’arbatiment as anula e tuta la lus polarisà *TM* a ven arfraïta anans ant ël véder. Sòn a veul dì che, a cost àngol d’incidensa, tuta la lus arbatùa a l’è polarisà *TE*.

## La coerensa

I pensoma a na lus d’autut monocromàtica emëttùa da na sors a pont ant ël pont *P*. I suponoma che la sors a sia a simetria sférica, ant ël sens che l’emission a sia istessa an tote le diression. Ant l’istant *t* e a la distansa *r* da la sors tuti ij pont an sla surfassa sférica con senter an *P* e ragg *r* a son séde d’un camp elétrich con l’istessa ampiëssa e l’istessa fase. Costa a l’è na surfassa d’onda, che, com i l’oma vist pér àutri tipo d’onda, as propaga ant lè spassi con velocità *c*. A na distansa gròssa da la sors as peul consideré che da na mira local la surfassa d’onda a sia un pian (onda pian-a). Su sta surfassa tuti ij pont a l’han l’istessa fase costanta, che a dipend nen dal temp ma mach da la distansa. Costa a l’è n’onda coerenta (con chila midema) ant ël temp e ant lè spassi. Un ragg èd lus che a peussa esse dëscrivù parèj a l’è un ragg èd lus coerenta.

An general i l’oma che la lus a ven generà da vibrassion èd càrie elétriche e, pr’exemple, la lus generà da un còrp foà al bianch a produv, prima ‘d tut, frequense diferente, che donca a produvo camp elétrich che a na dàita distansa a l’han fase diferente, peuj j’onde a parto an manera pì ò manch casual ant ël temp, e donca a nasso già con fase diferente, e peui la sors a peul mai esse mach un pont, e donca j’onde a parto ‘dcò da pont different. As trata donca ‘d motobin tanti emëttior che a emëtto na dàita quantità d’energià con na dëstribussion casual ant ël camp dël visibil e an moment casuaj. Un ragg èd costa lus a l’è un ragg èd lus nen coerenta.

Fra ij doi cas ch’i l’oma dit a-i son vàire cas reaj èd coerensa parsial. I vardoma sì dapréss còs i voroma dì cand i parloma ‘d **coerensa temporal** e ‘d **coerensa spassial**.

## Coerensa temporal

Se i suponoma na sors èd lus mono-cromàtica an manera përfeta, i podoma arpresenté soa onda con na sinusòid che a và a l’anfinì sensa gnu-ne variassion. Ma na sors real a l’è nen parèj. A na dàita mira, an manera pì ò manch casual, a peul essie un sàut èd fase com i l’oma arpresentà an figura 4.




Figura 4 - Coerensa 'd fase

Na lus monocromàtica a l'ha na frequensa  $f_0$  fissa, mentre na lus real a peul esse pensà coma na série ‘d treno d'onda con na frequensa comprèisa ant l'interval  $f_0 + \Delta f$ . Pér treno d'onda intendoma la série ‘d periòdo andova l'onda a l'è mono-cromàtica pèrfeta. Se i osservoma l'onda che a passa ant un pont  $P$ , i vèddroma che a mantén soa fase mach pér un temp  $\Delta t$ , che a l'è dl'órdin èd grandëssa dl'anvers èd  $\Delta f$ .

I suponoma d'arferisse al camp elétrich  $E$  e donca nòstra onda a peul esse dëscrivùa ant èl pont  $P$  coma  $E(t) = E_0 \cos(\omega t + \varphi(t))$ , andova  $\varphi(t)$  a l'è costant ant l'interval medi  $\Delta t$ , mentre fra n'interval e l'àutr sò valor a càmbia an manera casual fra  $0$  e  $2\pi$ . Ansema a la fàse a peul èdcò cambié l'ampièssa màssima  $E_0$ . An nòstr modél as peul supon-e che  $\Delta t = \frac{1}{\Delta f}$ .

L'interval èd temp  $\Delta t$  a ven ciamà “**temp èd coerensa**”. Pér na sors monocromàtica teòrica sto temp a sarà anfinì. Cand a càpita che  $f_0 \gg \Delta f$ , antlora as dis che la sors a l'è “**quasi mono-cromàtica**”.

## Coerensa spassial

I podoma dëstingoe doi tipo ‘d coerensa spassial, che i ciamroma èl prim longitudinal e lë scond lateral. I-j vardoma sì sota.

### Coerensa spassial longitudinal

Ant l'interval èd temp  $\Delta t$  la lus a pèrkor na distansa  $\Delta l$  che a sarà dàita da  $\Delta l = c \cdot \Delta t$ . Costa a l'è la distansa, ciamà “**longhëssa ‘d coerensa**”, che la lus a peul esse considerà monocromàtica. Se i consideroma doi pont  $P_1$  e  $P_2$  an sl'istéss ragg èd lus emëttù da na sors  $S$ , che a sio a la distansa  $d_{1,2} = P_2 - P_1$ , se i l'oma che  $\Delta l \gg d_{1,2}$  i disoma che l'onda an  $P_2$  a l'è motobin corelà con l'onda an  $P_1$  e i podoma consideré ‘l rapòrt fra  $d_{1,2}$  e  $\Delta l$  coma ‘l gré ‘d coerensa spassial longitudinal dij pont  $P_2 - P_1$ .

### Coerensa spassial lateral

Sta coerensa a l'è relativa a doi ragg emëttù da l'istessa sors  $S$  che, ant la realtà, a sarà nen mach un pont, ma a l'avrà na dàita estension. Se doi pont emëttitor  $S_1$  e  $S_2$  dla sors a son a na distansa  $d_{1,2}$  gròssa rispét a la longhëssa d'onda  $\lambda_0$  dl'onda emëttùa, as compòrto an manera d'autut andipendenta e ij ragg che a rivo dai doi pont a l'han nen corelassion èd fase fra ‘d lor.

Se da un pont genérich  $S$  dla sors a seurtó doi ragg che a rivo, ant l'órdin, ant ij pont  $P_1$  e  $P_2$ , se ij doi pont a son davzin a basta pér che ij camin òtich  $SP_1$  e  $SP_2$  a l'àbio fra ‘d lor na diferensa  $\Delta d = SP_1 - SP_2$  cita rispét a la longhëssa d'onda  $\lambda_0$  dl'onda emëttùa, antlora i podoma supon-e che ‘dcò ij camp elétrich an pont  $P_1$  e  $P_2$  a sio j'istéss.

Doi pont qualunque  $P_1$  e  $P_2$  a l'avran na corelassion èd fase (vis-a-dì che a manten-o l'istessa diferensa ‘d fase), se la diferensa  $\Delta d$  dij doi camin òtich fra ij pont e un pont  $S$  genérich dla sors a l'è pì cita dla “**longhëssa ‘d coerensa**”  $\Delta l = c \cdot \Delta t$  ch'i l'oma vist. Donca se:

$$\Delta d < \Delta l = c \cdot \Delta t = \frac{c}{\Delta f} = \frac{\lambda_0^2}{\Delta \lambda}$$

e costa a ven ciamà “**coerensa spassial lateral**”.

A l'è nentut sì lòn ch'as peul dì an sla coerensa, ma pér adéss is fèrmoma sì. I giontroma peui lòn ch'a podrà serve se a sarà 'l cas.

## INTERFERENSA E DIFRASSION

Pér adéss i suponoma d'onde mono-cromàtiche e coerente a l'anfinì. Che a peulo donca esse arpresentà ant ògni pont e ògni moment con na fonsion sinusoidal.

### Prinsipi 'd Huygens-Fresnel

I l'oma già parlà dë sto prinsipi ant le part d'òtica geométrica. Sì i lo arpijoma, dal moment che a l'è motobin amportant pér lòn ch'i diroma peui.

I l'oma già acenà al concét ed “*front d'onda*”. I disoma che, dàita n'onda che as propaga ant lë spassi, le surfasse continue (almanch an manera local) formà dai pont che a l'han l'istessa fase a son ij front d'onda. L'onda as propaga an diression normal a coste surfasse. Pér n'onda pian-a coste surfasse a saran èd pian, pér n'onda sférica ste surfasse a saran sfere.

El prinsipi 'd Huygens-Fresnel a dis che ògni front d'onda a peul esse considerà coma l'ansema 'd sors a pont che a emëtto d'onde sfériche. La propagassion ant èl temp  $\Delta t$  dël front d'onda a l'è nen d'àutr che l'arzultant èd tute coste onde dòp èl temp  $\Delta t$ . An manera pì precisa i podoma dì che çgni element èd surfassa ds dël front d'onda s a peul esse considerà coma na sors secondaria an fase con l'onda primaria, e con n'ampiëssa proporsional a cola dl'onda primaria e a la surfassa ds. La përturbassion che as produv ant un pont dlë spassi as peul sempe oten-e coma adission èd tute j'onde sfériche secondarie che a rivo an col pont. I provoma a ilustré sto prinsipi pér onde pian-e e onde sfériche an figura 5.




Figura 5 - Prinsipi 'd Huygens - Fresnel

Costa sempia formulassion a corispond a un modél simplificà, e a ventrià spieghé còs a càpita nat le diression che a son nen cola ‘d propagassion. Pér adéss is contentoma ‘d sòn.

## Interferensa

Se ant un pont genérich dlë spassi a agisso doe onde luminose, a val ël prinsipi dla dzoraposition dj'efet. Se donca is arferima al camp elétrich, cost a sarà l'adission vетorial dij doi camp pijà an manera separà.

Pér semplifiché i consideroma nen j'efét che a dipendrò da la polarisassion dla lus, e i tratoma ‘l camp elétrich coma se a fissa scalar.

Se doe onde a concoro ant un pont, e ste doe onde a l'han na frequensa differenta, i l'oma vist a propòsit d'àutri tipo d'onda (mecaniche, acustiche, etc.) che i podoma avèj vàire cas different an fonsion èd com a l'è ‘l rapòrt dle doe frequense. An general doe onde parèj a son nen coerente fra ‘d lor. Sì, anvece, i consideroma doe onde con l'istessa frequensa, che a rivo ant ël pont ognidun-a con na soa fase. I podoma supon-e ‘dcò ch'a l'abio l'istessa ampiëssa màssima, ma sòn a l'è nen necessari.

I podoma supon-e, pr'esempi, che j'onde a rivo da sors coerente e che, pér rivé al pont  $P$ , a l'han, ant l'ordin, le distanse  $x$  e  $x + \Delta x$ . I l'oma suponù che j'onde a sio mono-cromàtiche, con l'istessa gfrequensa e l'istessa ampiëssa e che donca a peusso esse arpresentà da doe fonsion dël tipo:

$$y_1 = Y \sin\left(\frac{2\pi}{\lambda}x - \omega t - \varphi_1\right) ; \quad y_2 = Y \sin\left(\frac{2\pi}{\lambda}(x + \Delta x) - \omega t - \varphi_2\right)$$

andova  $\varphi_1$  e  $\varphi_2$  a son le fase d'emission dle doe sors, che as manten-o ant ël temp.

La differensa ‘d fase costanta dle doe onde, ant ël pont  $P$ , a sarà donca dàita da :  

$$\Delta\varphi = \frac{2\pi \Delta x}{\lambda} + \varphi_2 - \varphi_1$$

An fonsion èd costa differensa ‘d fase l'interferensa a peul esse costrutiva, se le doe onde a l'han  $\Delta\varphi = 0$  e donca a son an fase, a peul esse anvece dëstrutiva se le doe onde a l'han  $\Delta\varphi = \pi$  e donca a son an oposition èd fase, e a peulo essie tuti ij cas antramés. Se is arferima a j'intensità dla lus  $I_1$  e  $I_2$  socià a le doe soirs, coste a son anlià al valor dël camp al quadrà, second d'espression dël tipo:  $I_1 = C y_1^2$  ;  $I_2 = C y_2^2$ , andova  $C$  a l'è na costant.

L'intensità total  $I_{tot}$  a sarà donca l'adission dle doe intensità, vis-a-dì  $I_{tot} = C(y_1^2 + y_2^2)$  e se, com i l'oma suponù, le doe intensità a son istesse e a valo  $I_0 = I_1 = I_2$ , sostituend j'espression sì dzora e fasend ij càlcoj. As oten che :

$$I_{tot} = 4 I_0 \cos^2 \frac{\Delta\varphi}{2}$$

Se le fase  $\varphi_1$  e  $\varphi_2$  èd partensa a son j'istesse, antlora i l'oma che  $\Delta\varphi = \frac{2\pi \Delta x}{\lambda}$ .

## Difrassion

I l'oma già acenà a sto fenòmeno ant l'òtica geométrica. La difrassion a l'è giustificà dal prinsipi 'd Huygens ch'i l'oma vist prima, e a dà 'l lìmit dl'aprossimassion dl'òtica geométrica, che a considera che la lus as propaga pér ragg che a son righe drite fin-a a cand as treuva nen surfasse andova l'indes d'arfrassion a càmbia, ò surfasse che a arbato, a assòrbo ò a difondo la lus.

El fenòmeno dla difrassion a càpita cand la lus a 'ncontra d'ostàcoj che a lìmito an part soa propagassion. A dventa evident da na mira macroscòpica cand le longhësse an geugh relative a costi ostàcoj a son dl'órdin èd grandëssa dle longhësse d'onda an geugh. I l'oma 'dcò vist che sto fenòmeno a càpita pér tuti ij tipo d'onde, da cole mecaniche an 's na surfassa liquida a cole 'd pression fin-a a tute cole eletro-magnétiche (onde radio, onde luminose, fin-a ai ragg  $\gamma$ ).

An nòstr cas la difrassion a l'è donca la presensa 'd lus da 'd là 'd lòn ch'a dirìa la lej èd propagassion dij ragg pér righe drite. La clàssica figura 6 a mostra doi cas d'anterésse pér ilustré sto fenòmeno.




Figura 6 - La difrassion

As trata 'd n'onda pian-a che as propaga ant el sens dla fletia e che ant el prim cas a treuva n'ostàcol con n'overtura larga rispét a la longhëssa d'onda, mentre ant le scond cas l'overtura a l'è dl'istess órdin dla longhëssa d'onda. A son arpresentà ij front dl'onda, e pér el front che as treuva ant l'overtura i l'oma aplicà 'l prinsipi 'd Huygens, suponend sto front fait da sors secondarie. La figura a arpresenta an doe dimension, la session normal a l'ostàcol. I suponoma che ant l'àutra dimension la filura a sia motobin longa.

Se l'overtura  $d$  a l'è motobin larga rispét a la longhëssa d'onda  $\lambda$ , antlora i podoma sperimenté che oltra l'ostàcol a continua un ragg che a projeta giusta l'overtura (ò almanch parèj a smija). Cost a l'è 'l camp èd l'òtica geométrica, andova ij ragg a son righe drite.

Ma se a val el prinsipi 'd Huygens, e ògni element dël front d'onda ch'as treuva ant la filura a gènera d'onde sfériche, antlora dòp la filura a-i saran èdcò èd ragg sbiéss an tute le diression. A venta 'dcò ten-e present che fra costi ragg a-i saran fenomeno d'interferensa che a peulo anulé ò fé chérse j'efét èd costi ragg.

Pér studié la còsa da na mira sperimental, lassand la teorìa a la session convenienta 'd coste nòte, i podoma pensé a n'esperiment coma col mostrà an figura 7.

I notoma che l'esperiment a peul esse fàit con tipo different d'onde eletromagnétiche, coma pr'esempi infra-ross ò micro-onde. A basta giusta ten-e present col ch'a l'è l'indes d'arfrassion dël material dovrà pér cole frequense. I disoma 'dcò che la parafin-a, pér le micro-onde, as compòrta com él véder pér la lus visibil. Frequense pì basse a përmëtto 'd travajé con dimension èd filura manch crítiche.

Na lus monocromàtica 'd longhëssa d'onda  $\lambda$  as propaga pér onde pian-e e a riva a na filura larga  $d$  ant nè scherm. I suponoma che la lus, dòp la filura, a sia componùa da ragg che a van an tute le diression, a rason dël prinsipi d'Huygens. Dòp la filura i piassoma na lent convergente che a l'ha na distansa focal  $f$ . An sël pian focal a peul bogesse ant un pont  $P$  un misurador dl'intensità luminosa. Èl pont  $P$  as treuva a la genérica distansa  $h$  da l'ass òtich.




Figura 7 - Misura dl'intensità angolar dòp la filura

Da l'òtica geometrica i l'oma vist che an sël pian focal a convergio tui ij ragg che a rivo paraléj a la lent, ant un pont che a dipend da la diression dij ragg. Rispet a l'ass òtich, ij ragg con inclinassion  $\alpha$  a rivo ant él pont  $P$ , con autëssa  $h$ , tal che  $\alpha = \text{artg} \frac{h}{f}$ , andova  $f$  a l'è la distansa focal dla lent.

I podoma donca arlevé la dëstribussion dle luminosità an fonsion dl'àngol  $\alpha$  èd propagassion dòp la filura.

Dàita na longhëssa d'onda  $\lambda$ , as arpét costa misura pér vàire larghësse  $d$  dla filura e donca pér different rapòrt  $\frac{\lambda}{d}$ .

Lòn ch'as treuva a l'è arpresentà an manera schemàtica andicativa an figura 8. As nòta che cand la filura a l'è cita coma la longhëssa d'onda, dòp la filura la lus a viagia, second él primsipi 'd Huygens, coma se a fussa emëttùa da na sors sférica, con quàich coression, dal moment che la diression normal a l'è un pòch privilegià. Man man che la filura as èslarga, la lus dòp la filura a tira sempe 'd pì a manten-se paralela a l'ass, mentre as nòto, a àngoj pì gròss, èd màssim secondari antervalà da mìnìm andova l'intensità a và a zero. La posission èd costi màssim e 'd costi mìnìm a dipend dal rapòrt  $\frac{\lambda}{d}$ . A l'è fácil anmaginé che as trata d'un fenòmeno d'interferensa.




Figura 8 - Difrassion dla lus da na filura

## Interferensa da difrassion

Sì i foma quàich considerassion an sj'efét dla difrassion, sensa sté a vardé le còse ant l'ancreus (e i l'oma già dit èl pérchè).

### Interferensa da na filura

Pér adéss i continuoma a consideré mach na filura coma cola vista sì dzora, e is arferima a la figura 9. I suponoma che la filura a sia larga  $d$  e i consideroma le cobie d'onde 'd Huygens generà da doi pont qualunque dla figura che a sio a distansa  $\frac{d}{2}$ . I suponoma sempe che an sla filura a rivo ij front d'onda èd na lus coerenta 'd longhëssa d'onda  $\lambda$ .

I consideroma che ij doi ragg (dle onde 'd Huygens) che a rivo an 's un pont  $P$  èd nè scherm butà lontan a basta da la filura (e pérpendicolar a la diression dla lus an arriv e paralél a la filura) e che a parto da un bord dla filura (ragg  $a$ ) e dal senter dla filura (ragg  $b$ ) a peusso esse considerà paraléj. Rispét a l'ass dla filura sti ragg a l'avran n'àngol  $\alpha$  e na diferenza 'd camin òtich dàita da  $\delta$ , che a val  $\delta = \frac{d}{2} \sin \alpha$ .

A l'è ciàir che se l'àngol  $\alpha$  a val 0, tute jonde che a rivo al pont  $P$  a son an fase e l'interferensa a l'è costrutiva, e l'intensità a l'avrà l'màssim absolut. Se anvece l'àngol  $\alpha$  a l'è tal che  $\delta = \frac{d}{2} \sin \alpha = \frac{\lambda}{2}$ , antlora l'interferensa a sarà dëstrutiva, e le doe onde as elìmino l'un-a con l'àutra. Sòn, a col àngol, a val pér tute le cobie 'd ragg distant fra 'd lor  $\frac{d}{2}$ , vis-a-dì pér tuti ij ragg.

A st'àngol, antlora, a corispond n'intensità ch'a val zero, e cost a l'è él minim dël prim órdin. Passand da l'àngol zero a l'àngol dël prim mìnim, j'onde a arzulta man man pì sfasà, e soa adission a diminuiss éd valor. J'angoj che a corispondono a interferensa déstrutiva pér tute le cobie 'd ragg a son coj che a rendo vera la relassion  $\sin \alpha = \frac{n\lambda}{d}$ , andova  $n$  a l'è un nùmer antrégh. Fra costi mìnimi che a valo zero, a venta che a-i sia 'd màssim relativ, che però a son motobin pì cit dël massim assolut.




Figura 9 - Interferensa da na filura

## Un lìmit pér jë strument òtich

Se as deuvra un beucc sircolar anvéce che na filura, as treuva quaicòs che a smija a lòn ch'i l'oma trovà sì dzora. An particolar a arzulta che cand la lus a passa travers un beucc sircolar, a produv an 's nè scherm un disch éd màssima intensità con antorna n'anél scur che a corispond a n'àngol con él cò antël beucc e n'overtura  $\alpha$  tal che  $1,22 \cdot \lambda = d \cdot \sin \alpha$ . Dòp l'anél nèir a-i è torna n'anél luminos che a corispond al prim màssim relativ, e via fòrt coma prima.

Na lus che a passa travers un diafragma a produv sta difrassion, che a arzulta un lìmit pér la precision, an general djë strument òtich. An efét, se is arferima a figura 10, i l'oma doi pont  $P_1$  e  $P_2$  che a mando ij ragg  $r$  e  $s$  travers él diafragma largh  $d$ , pér peui rivé an slë scherm  $S$ .




Figura 10 - Lìmit éd risolussion d'un diafragma

Sti doi ragg a formo n'àngol  $\gamma$  fra 'd lor. I l'oma vist che un ragg che a traversa un beucc a provoca na figura 'd difrassion an slë scherm  $S$ , che a l'è un disch che a l'è vist con l'ouveratura  $\alpha$  dita sì dzora. A l'è ciàir da la figura che se l'àngol  $\gamma$  a l'è trop cit, ij doi pont a produvo d'imàgin che as mès-cio. A-i è un criteri, dit ed Rayleigh, che a dà l'àngol  $\gamma$  mìnim fra ij doi ragg pérchè le relative imàgin a sio dëstingoibij.

El critéri a dis che 'l màssim dla figura 'd difrassion dàita da un pont a venta ch'as avzin-a nen pì che a la mira dël prim mìnim dàit da la figura 'd difrassion ed l'àutr. Sòn a pòrta a conclude che a deuv esse:

$$\sin \gamma = \sin \alpha = \sin \frac{\lambda}{d}$$

che pér àangoj cit a dventa  $\gamma = \alpha = \frac{\lambda}{d}$ .

## Interferensa da doe filure – Esperiment ed Young

I suponoma na preuba coma cola illustrà an figura 11, andova i l'oma n'onda pian-a che a riva pérpendicolar a né scherm  $S_1$ , e donca con ij front d'onda paraléj a lë scherm midem. Ant lë scherm a-i son doe filure paralele  $F_1$  e  $F_2$ , e a na distansa gròssa da le scherm  $S_1$  a-i è né scherm  $S_2$  paralel al prim, andova as peul vëdde la lus che a riva da le filure. Le filure peui a son motobin longhe rispét a lòn ch'a son larghe, an manera che i podoma vardé 'l problema an doe dimension, second la session disegnà an figura.




Figura 11 - Interferensa da doe filure

L'onda pian-a che a riva contra lë scherm  $S_1$  a l'è n'onda monocromàtica. Da le filure  $F_1$  e  $F_2$ , che i suponoma esse pì strèite dla longhëssa d'onda  $\lambda$  dla lus incidenta, a seurto doe onde coerente cilindriche generà da jë stessi front d'onda. Le filure a son a na distansa  $d$  fra 'd lor e lë scherm  $S_2$  a l'è a na distansa  $D$  da lë scherm  $S_1$ , con  $D \gg d$ .

An slë scherm  $S_2$  riva la lus da le filure e as forma n'imàgin dàita da bande ciàire antërcalà a bande scure. Coste a son dite "**frange d'interferensa**". Pér studié ste frange 'l procediment a l'è pitòst sìmil a col ch'i l'oma dovrà prima.

I considero 'l pont genérich  $P$  an slë scherm  $S_2$ , che a l'è a distansa  $x$  da l'ass normal a lë scherm e che a passa pér el senter dël segment che a uniss le doe filure. Sto pont a arsèiv el ragg  $s$  che a riva da  $F_1$  e 'l ragg  $t$  che a riva da  $F_2$ . Dal moment che  $D \gg d$ , i podoma consideré che 'l pont  $P$  a arsèiv da la diirection  $r$ , doi ragg, che a parto con l'istessa fase, dont la diferensa 'd camin òtich a l'è  $\delta$ . Se  $\varphi$  a l'è l'àngol fra l'ass e la riga drita  $r$ , antlora i l'avroma che  $\delta = d \sin \varphi$ .

Antora i l'avroma che la diferensa 'd fase  $\theta$  dle doe onde a sarà dàita da  $\theta = \frac{\delta}{\lambda} 2\pi$ . Sta diferensa 'd fase a sarà donca fonsion dl'àngol  $\varphi$ , e sostituend:

$$\theta = 2\pi \frac{d}{\lambda} \sin \varphi$$

Sòn a pòrta a n'intensità dla lus ant el pont  $P$  dàita da:

$$I = 4 I_0 \cos^2 \frac{\theta}{2} = 4 I_0 \cos^2 \left( \pi \frac{d}{\lambda} \sin \varphi \right)$$

andova  $I_0$  a l'è l'intensità che a sarìa dàita da na filura sola (onda sférica).

El cosen al quadrà a val 1 cand so argoment a val  $n\pi$ , con  $n$  nùmer antrégh che a va da 0 anans, e a val 0 cand so argoment a val  $\left(\frac{2n+1}{2}\right)\pi$ . Da sì as treuva che l'intensità a presenta 'd màssim cand  $\pi \frac{d}{\lambda} \sin \varphi = n\pi$  e donca  $\sin \varphi = n \frac{\lambda}{d}$ . A l'istessa manera i l'avroma ij mìnims d'intensità cand  $\pi \frac{d}{\lambda} \sin \varphi = \frac{n+1}{2}\pi$  e donca  $\sin \varphi = (2n+1) \frac{\lambda}{2d}$ .

An pràctica a venta ten-e cont che le filure a l'han sempe na dimension finìa edonca quàich fenòmeno 'd difrassion da na filura (coma col ch'i l'oma vist prima) a lo produvo. A parte dal prim màssim an sl'ass, j'àutri màssim a son nen d'ampièssa costanta, ma a calo man man che l'àngol a chërs.




Figura 12 - Esperiment èd Young

L'esperiment èd Young a l'è dë sto tipo e, ant èl 1801, a l'è servì a dimostré la natura ondula tòria dla lus. I lo arpresentoma an figura 12. La sors dovrà a l'è la lus dël sol, che con nè spécc a l'è mandà contra un cit beucc (dimension dle longhësse d'onda) arcavà ant nè scherm A. La lus dël sol a l'è, da 's pér chila, nen coerenta, e a l'è formà da väire treno d'onda e väire color.

La lus che a passa dal beucc a dà orìgin a onde sfériche che a l'han l'istéssa natura iregolar dla lus incidenta an slë scherm A. As trata però èd surfasse sfériche che an tuti ij pont a l'han j'istesse carateristiche coma fase, frequensa, ampiëssa. Cand coste surfasse a rivo a la distansa  $D_1$ , che a l'è gròssa rispét a la distansa  $d$  dij doi beucc che as treuva an slë scherm B, a peulo esse considerà coma onde pian-e, e an sij doi beucc (cit coma 'l prim) as presenta l'istéss front ant l'istéss moment.

Ij doi beucc dlë scherm B a dvento sors d'onde sfériche che fra 'd lor a son coerente, fàite da surfasse istesse che as propago a l'istessa manera. Pér ste doe onde, ògni moment, a valo le considerassion ch'i l'oma fàit prima. An slë scherm C as formo antlora le frange d'interferensa con jë stéss criteri.

La diferensa, adéss, a l'è che a son presente tute le frequense dla lus visibil e donca, dal moment che la separassion dle bande luminose a l'è anlià a la frequensa, le bande luminose a tiro a scompon-se ant ij different color.

## Retìcol èd difrassion

I l'oma vist che un beucc ò na filura a produvo na difrassion dla lus, che se le dimension a son dl'ordin dla longhëssa d'onda as traduv an lus che a part da la filura coin na simetrìa quasi semi-sférica, mentre che se la filura as èslarga, man man as forma un màssim prinsipal sempe pì strèit e 'd frange lateraj motobin pì cite.

Con doe filure la figura 'd difrassion a l'è pì ciàira, ma, an pràtica, ij massim lateraj as arduvo sempe pitòst ampressa, e sòn pérchë ògni filura a tira a avèj soa figura 'd difrassion, e costa a anteragiss con la figura 'd l'àutra. Pér avèj la situassion teòrica a ventrià che le doe sors a fusso 'd pont ò segment matemàtich, sensa na larghëssa finìa.

A ven antlora da ciamésse se le còse a dvento 'ncora pì bon-e se le filure a dvento tante. Tante filure paraléle an " nè scherm a formo col ch'a ven ciamà "**retìcol èd difrassion** ". I provoma antlora a arpete 'l rasonament an sto cas, e is arferima a figura 13.

I notoma che un retìcol coma col arpresentsà a peul esse otnù, pr'esempi, pér depòsit fotografich èd righe opache su material transparent, an manera 'd lassé le filure da 'ndova a peul passé la lus. I suponoma che la distansa fra doe filure a sia costanta e a vala  $p$ , che a ven ciamà "**pass dël retìcol** ". N'àutra carateristica 'd base a l'è la larghëssa  $d$  dle filure e 'dcò costa a l'è considerà costanta.

An figura 13 a l'è arpresentsà la manera 'd misuré l'intensità che a ven propagà ant le differente diression, a l'istéssa manera ch'i l'avio vist an figura 7. Ògni filura a pròvoca na difrassion coma cola ch'i l'oma vist prima, e j'efét as adission-o provocand neuve interferenze costrutive ò dëstrutive. La distribussion èd frange ch'as oten a l'è anlià a la longhëssa d'onda dovrà e a le carateristiche dël retìcol midem.




Figura 13 - Reticol ed difrassion

I arpetoma, an figura 14, na figura tipo figura 11, ma sta vira pér un reticol con vaire filure. I vardoma cola ch'a l'è la condission pér avèj j'onde generà da le filure, an fase an sël pont  $P$  dle scherm, che i suponoma sempe lontan a basta da podej consideré paraléj ij ragg che a rivo an s'un pont da le diferente filure.

Ij ragg  $s$  e  $t$ , ant él pont  $P$ , a l'avran na differensa 'd camin òtich dàita, com a l'era prima, pér le doe filure, da  $\delta = p \sin \varphi$  (a valo tute le semplificassion e considerassion ch'i l'oma fàit pér le doe filure).




Figura 14 - Condission pér onde an fase

L'interferensa costrutiva fra ij ragg  $s$  e  $t$  a ciama che a vala la relassion con la longhëssa d'onda  $\lambda$  dàita da  $\delta = p \sin \varphi = n\lambda$ , andova  $n$  a l'è un nùmer antrégh. Ma costa differensa 'd camin òtich, fin ch'i podoma consideré ij ragg paraléj, a val èdcò fra 'l ragg  $t$  e 'l ragg  $q$ . Se fra ij ragg  $s$  e  $t$  i l'oma, pr'esempi,  $\delta = \lambda$ , fra  $t$  e  $q$  a sarà 'ncora  $\delta = \lambda$ , e fra  $s$  e  $q$  a sarà  $\delta = 2\lambda$ .

An slë scherm  $S_2$  i l'avroma un màssim èd luminosità, pér na dàita longhëssa d'onda dla lus, an corispondensa ai valor antrégh dla  $n$  sì dzora, vis-s-dì pér  $x \approx D \sin \varphi = \frac{n\lambda}{p}$

An pràtica as osserva che ij màssim a calo con l'àngol. Dàite le ipòtesi ch'i l'oma fàit, tut sòn a val se 'l reficol a l'è cit rispét a la distansa  $D$ .

Dal moment che sti sogét a saran peui tratà ant la session dj'onde eletromagnétique, pér adéss is fèrmoma sì. I giontoma giusta 'ncora quaicòs an sl'arpresentassion dj'onde eletromagnétique.

*pàgina lassa veuida apòsta*

## ARPRESENTASSION DJ'ÓNDE E APROSSIMASSION

I parleroma èd costi sogét an manera pì completa and la pòrt relativa a eletricità e magnetism, ma sì an servo quàich nossion pér lòn ch'i voroma dì ant la part dòp costa.

### Equassion d'ónda

Ant un mojen qualunque l'ónda as propaga con na velocità  $c$  che a dipend da sò ìndes d'arfrassion  $n$ , second la relassion  $c = c_0/n$ , andova  $c_0$  a l'é la velocità dla lus ant ël veuid,

L'onda a l'é dëscrivùa da na fonsion  $u(\mathbf{r}, t)$ , dlë spassi e del temp, che a venta ch'a sodisfa a l'equassion diferensial

$$\nabla^2 u - \frac{1}{c^2} \frac{\partial^2 u}{\partial t^2} = 0$$

### Onda monocromàtica

L'arpresentassion èd l'onda monocromàtica, che a l'é peui cola che a serv a svilupé tuta la teorìa, a l'é dàita da l'equassion.

$$u(\vec{r}, t) = a(\vec{r}) \cos[\omega t + \varphi(\vec{r})]$$

Ampliessa e fàse a peulo esse fonsion dla posission ma, ant ògni pont,  $u$  a l'é na fonsion armònica dël temp.

### Arpresentassion compléssa.

Com as vëddrà bin a sò temp, a conven dovré n'arpresentassion dla fonsion real  $u(\mathbf{r}, t)$ , travers la fonsion compléssa  $U(\mathbf{r}, t)$ , dël tipo:

$$U(\vec{r}, t) = a(\vec{r}) e^{j\varphi(\vec{r})} e^{j\omega t}$$

an manera che  $u(\mathbf{r}, t)$ , a sia la part real dla fonsion  $U(\mathbf{r}, t)$ . Tute doe ste fonsion a venta che a sodisfo a l'equassion diferensial dj'ónde, ch'i l'oma scrivù sì dzora. St'equassion compléssa a peul èdcò esse scrivùa coma  $U(\vec{r}, t) = U(\vec{r}) e^{j\omega t}$  andova 'l fator  $U(\mathbf{r})$ , che a dipend nen dal temp, e che a val  $U(\vec{r}) = a(\vec{r}) e^{j\varphi(\vec{r})}$ , a ven ciàmà "**ampliessa compléssa**". Sòn a pòrta 'dcò a scrive che:

$$u(\vec{r}, t) = \operatorname{Re} \{U(\vec{r}) e^{j\omega t}\}$$

### Equassion èd Helmholtz.

Se, ant l'equassion diferensial dl'ónda i sostituima a  $u$  l'equassion  $U(\vec{r}, t) = U(\vec{r}) e^{j\omega t}$  i otnìma l'equassion:

$$\nabla^2 [U(\vec{r}) e^{j\omega t}] - \frac{1}{c^2} [-\omega^2 U(\vec{r}) e^{j\omega t}] \quad \text{vis - a - dì} \quad \nabla^2 U(\vec{r}) + \frac{\omega^2}{c^2} U(\vec{r}) = 0 \quad \text{vis - a - dì} \quad (\nabla^2 + k^2) U(\vec{r}) = 0$$

andova  $k = \omega/c$  a l'é dit "**nùmer d'onda**". Costa a l'é **l'equassion èd Helmholtz**.

I accordoma che  $U(\mathbf{r})$  a l'é l'ampiëssa compléssa dl'ónda. Èl mòdul  $|U(\mathbf{r})|$  a l'é l'ampiëssa dl'ónda mentre l'argoment  $\text{Arg}\{U(\mathbf{r})\}$  a l'é soa fase. Costa equassion a l'é na manera d'arpresenté l'onda an manera andipendenta dal temp.

## Intensità òtica

L'intensità òtica, che i ciamoma  $I(\mathbf{r}, t)$ , a l'é definìa coma la potensa pér unità 'd surfassa, e a l'é proporsional a la média dël quadrà dla fonsion d'onda.

$$I(\vec{r}, t) = 2 \langle u^2(\vec{r}, t) \rangle$$

andova la média a l'é fàita su un temp bin pì longh dël perìod dla lus, ma bin pì curt dij temp d'anterésse. Coma fator dla proporsionalità sì i l'oma dovrà 2, ma costa a l'é na sernùa arbitrària, che as mostrerà bon-a peui dòp.

## Onde elementar pian-e e j'ónde sfériche.

### Ónde pian-e

L'ampiëssa compléssa dj'ónde pian-e a l'é arpresentà da :

$$U(\vec{r}) = A e^{-jk\vec{k} \times \vec{r}} = A e^{-j(k_x x + k_y y + k_z z)}$$

andova  $A$  a l'é na costant compléssa, che a l'é ciamà "**anvlup compléss**", mentre  $\mathbf{k} = (k_x, k_y, k_z)$  a l'é ciamà "**vètor d'onda**". Pér che costa equassion a sodisfa a l'equassion èd Helmholtz, a venta che ij doi  $k$  a coincido, vis-a-di che  $k^2 = k_x^2 + k_y^2 + k_z^2$  e donca la grandëssa dël vètor d'onda a sia ugual al nùmer d'onda.

La fàse  $\text{Arg}\{U(\mathbf{r})\}$  a val  $\text{Arg}\{A\} - \mathbf{k} \times \mathbf{r}$ . Antlora ij front d'ònnda (che a son le surfasse a fase costanta, a saran arpresentà da l'equassion  $\vec{k} \times \vec{r} = k_x x + k_y y + k_z z = 2\pi q + \text{Arg}\{A\}$ , andova  $q$  a l'é un nùmer antrégh. Costa a l'é l'equassion èd na famija 'd pian normaj a la diression dël vètor  $\mathbf{k}$ , che a son a na distansa fra 'd lor èd  $\lambda = \frac{2\pi}{k}$ , ma i l'oma che  $k = \omega/c = 2\pi\nu/c$  e donca  $\lambda = \frac{c}{\nu}$ , che a l'é la longhëssa d'onda.

Se i pijoma l'ass  $z$  ant la diression dla propagassion  $\mathbf{k}$ , nòstra ampiëssa compléssa a dventa  $U(\vec{r}) = A e^{-j k z}$  e la fonsion d'onda  $u(\mathbf{r}, t)$  a dventa:

$$u(\vec{r}, t) = |A| \cos(\omega t - k z + \text{Arg}\{A\}) = |A| \cos\left[\omega\left(t - \frac{z}{c}\right) + \text{Arg}\{A\}\right]$$

Sta fonsion d'onda a l'é donca periòdica ant èl temp con un perìod  $1/\nu$ , e ant lë spassi con perìod  $2\pi/k$ . La fase dla fonsion d'onda compléssa  $U(\mathbf{r}, t)$  a val

$$\text{Arg}\{U(\mathbf{r}, t)\} = 2\pi\nu(t - z/c) + \text{Arg}\{A\}$$

e a varia, ant èl temp e ant lë spassi, coma fonsion dla variàbil  $(t - z/c)$ . Èl valor  $c$  a l'é ciamà "**velocità 'd fase dl'onda**".

Se un dàit mojen a l'ha ìndes d'arfrassion  $n$ , la velocità 'd fase a pija il valor  $c = c_0 / n$ , e coma consegoensa la longhëssa d'onda a dventa  $\lambda = c / v = c_0 / nv$ , donca 'dcò 'l nùmer d'onda, che a l'é  $k = 2\pi / \lambda$ , a dventa pì gròss che ant èl veuid, andova a val  $k_0 = 2\pi / \lambda_0$ . Donca  $k = n k_0$ .

## Ónda sférica

St'onda a corispond a la solussion dl'equassion èd Helmholtz:

$$U(\vec{r}) = \frac{A}{r} e^{-jk r}$$

andova  $r$  a l'é la distansa da l'orìgin e  $k = 2\pi v / c = \omega / c$  a l'é 'l nùmer d'onda. L'intensità 'd cost'onda a l'é proporsional invèrsa al quadrà dla distansa.

Pèr semplifiché i podoma supon-e che  $\text{Arg}\{A\} = 0$ , e ij front d'onda a son le surfasse dàite da  $\mathbf{r} = q\lambda$ , andova  $q$  a l'é un nùmer antrégh. As trata donca 'd surfasse sfériche separà da la distansa  $\lambda = 2\pi / k$ , che a viagio an diression radial a la velocità 'd fase  $c$ .

N'onda sférica che a part dal pont  $\mathbf{r}_0$  a l'ha n'ampiëssa compléssa  $U(\vec{r}) = \frac{A}{|r - r_0|} e^{-jk|r - r_0|}$ ,

mentre n'onda che a convèrgia vers èl pont  $\mathbf{r}_0$  a l'ha n'ampiëssa compléssa  $U(\vec{r}) = \frac{A}{|r - r_0|} e^{+jk|r - r_0|}$ .

## Aprossimassion èd Fresnel, onda parabòlica

I suponoma n'onda sférica che a parta con senter ant l'orìgin, e i consideroma 'd pont che a sodisfo a la condission  $\sqrt{x^2 + y^2} \ll z$ , vis-a-dì pont lontan a basta da l'orìgin e davzin a basta a l'ass  $z$ . An coste condission as peul apliché l'aprossimassion dij ragg parassiaj, pèr ragg che a parta da l'orìgin e a rivo an costi pont.

I definìma la variàbil  $\theta^2 = \frac{x^2 + y^2}{z^2}$ , e a sarà  $\theta^2 \ll 1$ . I definima 'l ragg  $\mathbf{r}$  con n'aprossimassion otnùa con ij prim doi termo èd sò svilup an série 'd Taylor.

$$r = \sqrt{x^2 + y^2 + z^2} = z\sqrt{1 + \theta^2} = z\left(1 + \frac{\theta^2}{2} - \dots\right) \approx z + \frac{x^2 + y^2}{2z}$$

A sta mira i podroma arscrive la fonsion  $U(r)$  dovrànd sto valor dla distansa  $r$  ant l'espression ch'i l'oma scrivù prima. I otnoma:

$$U(\vec{r}) = \frac{A}{z} e^{-jz} e^{-jk \frac{x^2 + y^2}{2z}}$$

St'equassion a coripsond a n'onda pian-a modulà da un fator che a corispond a un parabolòid. An efét un parabolòid èd rotassion antorna a l'ass  $z$  a l'ha equassion  $\frac{x^2 + y^2}{z} = \text{cost}$ .

An costa manera l'onda a l'é aprossimà da n'**onda paraboloidal**. Le condission èd validità dl'aprossimassion a son un pòch pì complicà che nen mach  $\theta^2 \ll 1$ . dal moment che a venta che 'l termo  $\frac{\theta^4}{8}$  (prim trascurà dla série), cand a ven moltiplicà pér  $kz$ , a continua a esse cit. A venta ch'a sia  $kz \frac{\theta^4}{8} \ll \pi$ , ma i stoma nen a andé pì ant ij particolar.

An figura 15 i schematisoma la situassion èd n'onda sférica generà ant un pont, e considerà an pont davzin a l'ass  $z$ , e projetà an sël pian  $xz$ .




Figura 15 - Aprossimassion pér j'onde.

Se  $z$  a dventa motobin gròss, pér ij pont antorna a l'ass  $z$ , l'equassion dl'ampièssa compléssa a dventa sempe pì davzin-a a cola dl'onda pian-a.

## Onde para-assiaj

As ès-ciamo "**onde para-assiaj**" le onde dont le normaj ai front d'onda a son ragg para-assiaj. Pér dé n'espression analitica 'd coste onde as peul parte da l'espression èd n'onda pian-a, e peui fène varié l'anvlup motobin pian con le variassion èd  $z$  (che i suponoma sempe la diression èd propagassion dl'onda pian-a).

I partoma antlora da l'espression dl'ampièssa compléssa dl'onda pian-a  $U(\vec{r}) = A e^{-jkz}$ , e peui i podoma "modulé" l'anvlup compléss  $A$  an manera 'd féo varié pian con la distansa. I scrivoma:

$$U(\vec{r}) = A(\vec{r}) e^{-jkz}$$

I l'oma dit che la variassion èd  $A(r)$  a venta che a sia cita su distanse paragonàbij a la longhëssa d'onda, an manera che l'onda midema a manten-a ij caràter èd n'onda pian-a. La fonsion d'onda  $u(\vec{r}, t)$  a dventa:

$$u(\vec{r}, t) = |A(\vec{r})| \cos [\omega t - kz + \text{Arg}\{A(\vec{r})\}]$$

An figura 16 i arportoma n'arpresentassion a la bon-a 'd costi concét, I l'oma n'onda, arpresentà al temp  $t = 0$ , con l'anvlup che a varia pian arlong l'ass  $z$ , ij front d'onda "quasi" pian e le normaj ai front coma ragg para-assiaj.




Figura 16 - Ragg para-assiaj

## Equassion para-assial èd Helmholtz

Pèr che l'equassion  $U(\vec{r}) = A(\vec{r})e^{-jkz}$  ch'i l'oma scrivù prima a peussa sodisfé a l'equassion èd Helmholtz, a venta che l'anvlup compléss  $A(\vec{r})$  a sodisfa a l'equassion che as oten sostituend  $U(\vec{r})$  ant l'equassion èd Helmholtz.

El consideré che  $A(\vec{r})$  a varia pòch con el varié èd  $z$  a veul dì che, ant na distansa  $\Delta z = \lambda$ , la variassion  $\Delta A$  a l'é motobin pì cità che  $A$  midem, vis-a-dì che  $\Delta A \ll A$ .

Dal moment che as trata 'd variàbij complésse, la disugualiansa as aplica an manera separà a le part reaj e a cole anmaginàrie.

I l'oma che  $\Delta A = \frac{\partial A}{\partial z} \Delta z = \frac{\partial A}{\partial z} \lambda$ , e donca a venta che a sia  $\frac{\partial A}{\partial z} \ll \frac{A}{\lambda} = \frac{A k}{2\pi}$  e donca i l'oma:

$$\frac{\partial A}{\partial z} \ll k A$$

e 'dcò la derivà sonda a càmbia pòch su distanse dl'órdin èd  $\lambda$ . Donca  $\frac{\partial^2 A}{\partial z^2} \ll k \frac{\partial A}{\partial z}$ , e donca i

podoma scrive che :  $\frac{\partial^2 A}{\partial z^2} \ll k^2 A$

Se adéss i andoma a sostituì nòstra  $A$  ant l' equassion èd Helmholtz, i podoma trascuré 'l termo  $\frac{\partial^2 A}{\partial z^2}$  rispét a  $k \frac{\partial A}{\partial z}$  ò rispét a  $k^2 A$ , e i otnima che

$$\nabla_T^2 A - j2k \frac{\partial A}{\partial z} = 0.$$

Costa a l'é ciamà l'**equassion parassial èd Helmholtz**. Ambelessì i l'oma indicà con  $\nabla_T^2$  l'operator èd Laplace trasversal, vis-a-dì relativ a le component trasversaj  $x$  e  $y$ :  $\nabla_T^2 = \frac{\partial^2}{\partial x^2} + \frac{\partial^2}{\partial y^2}$ .

## Relassion fra onde e ragg

As peul vèdde che l'òrica geométrica a l'é n'aprossimassion dl'òtica dj'onde luminose, cand le longhësse d'onda dla lus a tendo a zero.

I consideroma n'onda èd longhëssa  $\lambda_0$  ant ël veuid, che a traversa un mojen con ìndes d'arfrassion  $n(\mathbf{r})$  che a sia variabil pian con la posission, an manera da podèj esse considerà "**costant da na mira local**". I podoma scrive l'ampiëssa compléssa  $U(\mathbf{r})$  ant la forma:

$$U(\vec{r}) = A(\vec{r}) e^{-jk_0 S(\vec{r})}$$

andova  $A(\mathbf{r})$  a l'é l'ampiëssa,  $k_0 = 2\pi / \lambda_0$  a l'é l'nùmer d'onda e  $-k_0 S(\mathbf{r})$  a l'é la fase. I l'oma dit che  $A(\mathbf{r})$  a varia pian, an manera da podèj esse considerà costant ant l'interval èd na longhëssa d'onda. Ij front d'onda 'd costa onda a son le surfasse  $S(\mathbf{r}) = \text{costant}$ , mentre le lìnie normaj a coste surfasse a van ant la diression èd gradient  $\nabla S$ . Ant l'environ èd na dàita posission  $\mathbf{r}_0$ , l'onda a peul esse considerà n'onda pian-a con ampiëssa  $A(\mathbf{r}_0)$  e vetor d'onda  $\mathbf{k}$  con na grandëssa  $k = k_0 n(\mathbf{r}_0)$ , e con diression paraléla al gradient  $\nabla S(\vec{r}_0)$ .

## Equassion eiconal

Se i pijoma l'equassion èd Helmholtz e i sostituima l'espression trovà pér  $U(\mathbf{r})$ , fasend ij cont as oten l'equassion:

$$k_0^2 \left[ n^2 - |\nabla S(\vec{r})|^2 \right] A(\vec{r}) + \nabla^2 A(\vec{r}) - j k_0 \left[ 2 \nabla S(\vec{r}) \cdot \nabla A(\vec{r}) + A(\vec{r}) \cdot \nabla^2 S(\vec{r}) \right] = 0$$

Tant la part real coma la part imaginària a venta che a sio uguaj a zero, e donca se i consideroma la part real i l'oma  $k_0^2 \left[ n^2 - |\nabla S(\vec{r})|^2 \right] A(\vec{r}) + \nabla^2 A(\vec{r}) = 0$ . Se al pòst èd  $k_0$  i dovroma l'espression  $k_0 = 2\pi / \lambda_0$  i otnoma

$$\begin{aligned} k_0^2 n^2 A(\vec{r}) - k_0^2 |\nabla S(\vec{r})|^2 A(\vec{r}) + \nabla^2 A(\vec{r}) &= 0 \\ |\nabla S(\vec{r})|^2 &= n^2 + \frac{\nabla^2 A(\vec{r})}{k_0^2 A(\vec{r})} = n^2 + \frac{\lambda_0 A(\vec{r})}{2\pi A(\vec{r})} \end{aligned}$$

Se i soma an condission da podèj consideré che  $A(\mathbf{r})$  a cambia motobin pian, tant da podej esse considerà costant ant lë spassi èd na longhëssa d'onda, antlora i l'oma:

$$\frac{\lambda_0 A(\vec{r})}{2\pi A(\vec{r})} \ll 1$$

An particolar, se l'0 a tend a zero, sta condission a l'é sens'autr sodisfàita, e as peul conclude che  $|\nabla S(\vec{r})|^2 \approx n^2$  a l'é l'equassion eiconal dl'arpresentassion dla lus pér ragg.

Donca i l'oma che la fonsion scalar  $S(\mathbf{r})$ , che a l'é proporsional a la fàse dl'onda cand la lus a l'é arpresentà coma onda, a l'é 'dcò l'equassion eiconal èd cand la lus a l'é arpresentà coma ragg.

## Arbatiment èd nè spécc

I consideroma n'onda pian-a con vetor d'onda  $\mathbf{k}_1$ , che a sia incident an 's nè spécc che a staga ant èl pian  $z = 0$ . As produv n'onda arbatùa con vetor d'onda  $\mathbf{k}_2$ . J'àngoj d'incidensa e d'arbatiment a son q1 e q2, com a l'é mostrà an figura 17.




Figura 17 - Onda arbatùa da nè spécc

L'adission dle doe onde a sodisfa a l'equassion èd Helmholtz se ij doi vetor d'onda a son j'istéss, vis-a-dì che  $\mathbf{k}_1 = \mathbf{k}_2 = \mathbf{k}_0$ . Le condission al contorn an sla surfassa dlë spécc a son j'istésse pér tuti ij pont e a venta che ij front d'onda dij doi ragg a coincido. A venta donca che le fase a sio j'istésse, an sle spécc, pér le doe onde.

A venta donca ch'a sia:  $\vec{k}_1 \times \vec{r} = \vec{k}_2 \times \vec{r}$  pér qualunque  $\mathbf{r}(x, y, 0)$  an qualunque pont èd la surfassa. Ma, se i consideroma la diirection èd propagassion che a staga an sël pian  $x-z$ , i l'oma che  $\mathbf{r} = (x, y, 0)$ ,  $\mathbf{k}_1 = (k_0 \sin \theta_1, 0, k_0 \cos \theta_1)$  e ancora  $\mathbf{k}_2 = (k_0 \sin \theta_2, 0, k_0 \cos \theta_2)$ . Sostituend i l'oma :

$$\vec{k}_0 \sin \theta_1 \cdot x = \vec{k}_0 \sin \theta_2 \cdot x \quad \text{e da sì} \quad \theta_1 = \theta_2$$

## Incidensa an 's na surfassa fra doi mojen

I consideroma adéss un ragg che a incid an sla surfassa pian-a 'd separassion fra doi mojen omogéni con different ìndes d'arfrassion, che i disoma, ant l'órdin,  $n_1$  e  $n_2$ . I consideroma la surfassa an sël pian  $z = 0$ , e i suponoma ij ragg an sël pian  $x-z$ . L'onda incidenta, che a riva dal mojen con ìndes  $n_1$ , a l'avrà un vetor d'onda  $k_1$  e n'àngol d'incidensa  $\theta_1$ . Cost'onda a pròvoca n'onda arfràita che as propaga ant èl mojen con ìndes  $n_2$ , che a l'avrà vetor d'onda  $k_2$  e n'àngol d'arfrassion  $\theta_2$ . A-i sarà peui n'onda arbatùa ant èl mojen con ìndes  $n_1$  che a l'avrà un vetor d'onda  $k_3$  e n'àngol d'arbitiment èd  $\theta_3$ . Sòn secon lòn ch'i l'oma arpresentà an figura 18.




Figura 18 - Onde arfràita e arbatùa da na surfassa 'd separassion

Coma prima, pér che l'equassion ed Helmholtz a sia sodisfàita, a venta che ij nùmer d'onda a sia  $k_1 = k_3 = n_1 k_0$  e peui  $k_2 = n_2 k_0$ .

Coma prima le condission al contorn an sla surfassa a son j'istésse pér ògni  $\mathbf{r}(x, y, 0)$ , e ant ògni pont dla surfassa a venta che le tre onde a l'èbio l'istéssa fase. Donca:

$$\vec{k}_1 \times \vec{r} = \vec{k}_2 \times \vec{r} = \vec{k}_3 \times \vec{r} \quad \text{qualonque a sia } \vec{r}(x, y, 0)$$

ma i l'oma che :

$$\begin{aligned} \vec{k}_1 &= (n_1 k_0 \sin \theta_1, 0, n_1 k_0 \sin \theta_3) ; \quad \vec{k}_2 = (n_2 k_0 \sin \theta_2, 0, n_2 k_0 \sin \theta_2) \\ \vec{k}_3 &= (n_1 k_0 \sin \theta_3, 0, n_1 k_0 \sin \theta_3) \end{aligned}$$

Sostituend ant l'espression sì dzora i podoma trové, coma prima, che

$$\theta_1 = \theta_3 \quad \text{e che} \quad n_1 \sin \theta_1 = n_2 \sin \theta_2$$

che a son le lèj dë Snell.

Ant la sonda part dla figura i l'oma disegnà doi front d'onda con l'istéssa fase dl'onda incidenta, (e che donca a son distant la longhëssa d'onda  $\lambda_1$ ), che a rivo an sla surfassa ant ij pont  $P_1$  e  $P_2$ , dont la distansa a val  $\frac{\lambda_1}{\sin \theta_1} = \frac{\lambda_0}{n_1 \sin \theta_1}$ . An costi stéssi pont a-i son ij doi front d'onda con l'istéssa fase dl'onda arfràita che a l'avrà longhëssa d'onda  $\lambda_2$ , e che a contìnua a l'àngol  $\theta_2$ . La distansa fra sti doi pont  $P_1$  e  $P_2$ , vista da costa part, a val  $\frac{\lambda_2}{\sin \theta_2} = \frac{\lambda_0}{n_2 \sin \theta_2}$ , ma la distansa a l'é

sempe istéssa, e donca  $\frac{\lambda_0}{n_1 \sin \theta_1} = \frac{\lambda_0}{n_2 \sin \theta_2}$ , e donca :  $n_1 \sin \theta_1 = n_2 \sin \theta_2$ , lèj dë Snell.

## TRASMISSION DJ'ONDE TRAVERS ELEMENT ÒTICH

I doma n'uciada (pitòst ampresa) a com as peul dëscrive 'l comportament dj'element òtich cand as considera la lus coma onda eletromagnética.

### Onde travers na lastra pian-a

I comensoma a vèdde còs a suced cand l'onda a traversa na lastrin-a trasparenta a surfasse paraléle e pian-e. I consideroma che a propaghësse a sia nònonda pian-a.

### Onda normal a la lastra

La lastra a l'avrà un dàit ìndes d'arfrassion  $n$  e un dàit èspessor  $l$ . Fòra dla lastra i suponoma che a-i sia 'l veuid (ò l'ària, còse che sì i disoma "spassi liber"). I suponoma che l'onda pian-a as propaga an diressiun dl'ass  $z$  e che le doe surfasse 'd nòstra lastra a sio ij doi pian  $z=0$  e  $z=l$ . I butoma che l'ampiëssa complessa dl'onda a sia dàita da  $U(x, y, z)$ . I trascuroma j'arbatiment an sle surfasse (tant esterna d'intrada, coma interna 'd seurtia) che a saran anvece considerà ant la session relativa a l'eletrònica, parland d'amplificator òtich e 'd laser. La fonsion  $U$  a sarà contínua passand da drinta a fòra e al contrari.

I ciomoma  $T(x, y)$  e i lo disoma "**trasmëttensa dl'ampiëssa compléssa**", èl rapòrt fra l'ampiëssa an seurtia rispt a l'ampiëssa an intrada. Vis-a-dì:

$$T(x, y) = \frac{U(x, y, l)}{U(x, y, 0)}$$

L'onda incidenta da fòra a l'ha un nùmer d'onda  $k_0$ , e andrinta a la lastra a l'ha nùmer d'onda  $n k_0$ . A l'é ciàir che la frequensa a càmbia nen, mentre la longhëssa d'onda  $\lambda$  a càmbia an fonsion dl'indes d'arfrassion. I l'oma vist, an general, che  $U(\vec{r}) = A e^{-jkz}$  e 'l rapòrt sì dzora a dventa:

$$T(x, y) = \frac{U(x, y, l)}{U(x, y, 0)} = e^{-jn k_0 l}$$

Donca l'efét èd la lastra a l'é col d'antroduve na variassion èd fase  $n k_0 l = 2\pi \frac{l}{\lambda}$  con  $\lambda$  che a l'é la longhëssa d'onda ant la lastra.

### Onda dë sbiéss rispét a la lastra

Se la diressiun dla propagassion èd l'onda a forma un dàit àngol  $\theta$  rispét a la diressiun dl'ass  $z$ , e se sò vetor d'onda a l'é  $\mathbf{k}$ , (is arferima a figura 19), j'onde arfràita e trasmëttùa (drinta e dòp la lastra), a saran sempe d'onde pian-e che as propago a l'àngol  $\theta_1$  (drinta la lastra) con vetor d'onda  $\mathbf{k}_1$ , e  $\theta$  (dòp la lastra) con vetor d'onda  $\mathbf{k}$ , andova  $\theta$  e  $\theta_1$  a son ant la relassion dàita da la lèj dë Snell :  $\sin \theta = n \sin \theta_1$ .




Figura 19 - Onda dë sbiéss travers na lastra pian-a

Adéss l'ampiessa complessa  $U(x, y, z)$  ant la piastra a l'é dàit da  $U(\vec{r}) = A e^{-jk\vec{r}}$  e donca, se i consideroma la diression èd propagassion an sël pian  $x-z$ , aplican lòn ch'i l'oma fait prima, i otnoma:

$$T(x, y) = \frac{U(x, y, l)}{U(x, y, 0)} = e^{-jn k_0(l \cos \theta_1 + x \sin \theta_1)}$$

Se l'àngol d'incidensa a l'é cit (situassion parassial), antlora i podoma buté che  $\theta_1 = \frac{\theta}{n}$  e donca 'dcò  $\theta_1$  a l'é cit, e a val l'aprossimassion  $\sin \theta \approx \theta$  e  $\cos \theta = 1 - \frac{1}{2}\theta^2$ . Antlora i l'oma:

$$T(x, y) = e^{-jn k_0 l} e^{j \frac{k_0 \theta^2 l}{2n} - j k_0 \theta x}$$

Se peui le condission a son taj che as peussa consideré  $\frac{k_0 \theta^2 l}{2n} \ll 2\pi$ , coma dì che  $\frac{\theta^2 l}{2n \lambda_0} \ll 1$  (lastra motobin sutìla e àngol motobin cit), e 'dcò che  $\frac{\theta x}{\lambda_0} \ll 1$  pér tuti ij  $x$  d'anteresse, antlora as otén torna che  $T(x, y) = e^{-jn k_0 l}$  e la tramëttenza a dventa nen dipendenta da l'àngol d'incidensa.

## Onda travers na lastra dë spëssor variàbil

A rigor as trata pì nen èd na lastra pian-a, e sì i consideroma na lastra dë spëssor variàbil dàit da  $l(x, y)$ , e macassia sutil, comprèisa fra ij doi pian  $z = 0$  e  $z = l_0$ , an manera che pér ògni pont  $P(x, y, 0)$  as peussa andividooé né spëssor  $l(x, y)$  dla lastra e né spëssor  $l_0 - l(x, y)$  d'aria, andova  $l_0$  a l'é vist coma lë spëssor èd nòstr component òtich.

I consideroma peui che ant l'antorn dël pont  $P(x, y, 0)$  a-i sia n'onda, che a peul esse considerà pian-a, incidenta parassial a l'ass  $z$ .

La trasmëttenza total dël component òtich a parte dal pont  $P(x, y, 0)$  a sarà donca 'l prodòt èd la trasmëttenza dla làstra an col pont pér la trasmëttenza d'aria dël seul (ò dij seu) ch'a manca a fé lë spessor  $l_0$ . Soa espression a dventa :

$$T(x, y) = e^{-j(n - 1)k_0 l(x, y)}$$

Pér che a sio válida le aprossimassion ch'i l'oma fàit prima, a venta bin sicur ch'a sia  $\frac{\theta^2 l}{2n \lambda_0} \ll 1$  ma 'dcò che nen mach  $\frac{\theta x}{\lambda_0} \ll 1$  ma ch'a sia 'dcò  $\frac{\theta y}{\lambda_0} \ll 1$ .

## Lente sutìla

L'espression ch'i l'oma trovà sì dzora as peul apliché a na lente sutìla, che si i suponoma pian-bombà, e che i arpresentoma an figura 20.




Figura 20 - Lente sutìla

La lente a l'è na calòra dla sféra 'd ragg  $R$ . I suponoma coma sempe che l'ass dla lente a sia l'ass  $z$  èd nòstr sistema d'arferiment, con l'orìgin ant èl cò dla lente. Ij pont dla surfassa dla lente a son a coordinà  $x$  e  $y$  che sì i suponoma cit rispét al ragg  $R$ , e donca pont davzin a l'ass.

Ant un pont  $x, y$  lë spëssor dla lente a sarà dàit da  $l(x, y) = l_0 - \overline{PQ}$  ma a l'è 'dcò che  $\overline{PQ} = R - \overline{QC}$ , e 'dcò che  $\overline{QC} = \sqrt{R^2 - (x^2 + y^2)}$ , e donca i podoma scrive :

$$l(x, y) = l_0 - \left[ R - \sqrt{R^2 - (x^2 + y^2)} \right]$$

ma i l'oma dit che i consideroma mach pont con  $x$  e  $y$  motobin cit rispét a  $R$  (pont davzin a l'ass), e donca  $x^2 + y^2 \ll R^2$ . An sto cas i podoma fé l'aprossimassion che i arportoma sì sota:

$$\sqrt{R^2 - (x^2 + y^2)} = R \sqrt{1 - \frac{x^2 + y^2}{R^2}} \approx R \left( 1 - \frac{x^2 + y^2}{2R^2} \right)$$

e donca i podoma aprossimé nòstr espessor con :

$$l(x, y) = l_0 - \left[ R - R \left( 1 - \frac{x^2 + y^2}{2R^2} \right) \right] = l_0 - \frac{x^2 + y^2}{2R}$$

La trasmëttenza dla lente  $T(x, y)$  as oten sostituend ant l'espression ch'i l'avio trovà sì dzora pér la trasmëttenza èd na lastra a spessor variabil, l'espression dlë spessor dla lente an fonsion èd  $x$  e  $y$ . Donca i l'oma

$$T(x, y) = e^{-j(n-1)k_0 l(x, y)} = e^{-j(n-1)k_0 \left( l_0 - \frac{x^2 + y^2}{2R} \right)}$$

Un fator èd costa trasmëttenza a l' dàit da un  $h_0 = e^{-j(n-1)k_0 l_0}$  che a arpresenta un fator costant èd fase, che 'd sòlit a l'ha nen significà, mentre l'autr fator a dà a l'onda incidenta na fàse proporsional a  $x^2 + y^2$  che e a pròvoca 'l passagi a n'onda paraboloidal sentrà a distansa  $f$  da la lente (sòn i stoma nen a dimostrelo). An efét, butand  $f = \frac{R}{n-1}$ , la trasmëttenza a ven arpresentà da:

$$T(x, y) = h_0 e^{jk_0 \frac{x^2 + y^2}{2f}}$$

Pér adéss is fèrmoma sì e peui, se a-i na sarà da manca, i arpijroma sto discors.